

■ GLOSSA

Grazia ch'i dat Vus!

DA SILVIO CAMENISCH

Grazia signur Blocher ch'i dat Vus. Dastgass jau bittebitte tutgar almain las chautschas da Voss vestgì cumplet dad umens fatg sin mesira, daventass jau puspè sauna. Savais, jau na sun betg la pli sauna. Ves'ins er, sch'ins vesa mai. Ina sauna n'hai jau betg en chasa, dal mument che jau na lasch betg vi abitaziuns ad esters. Jau na sun betg speculanta, betg Hildebranda! Esters, senzupalpiris, criminals economs da lezza gianira tegn jau ord chasa. Pertgira Ti, bab divin, nossa chasa e curtin! Grazia. Vus signur Blocher avess jau gì gugent sco bab patern. Bab etern, Ewiger Vater, adur jau tar Vus mintga damaun e saira en mes credo. Jau na lasch or nagingas damauns e sairas.

Mintgin mintgina dovra ses credo, s'insla, buna dunna. Èsi per insatgi la messa en c-moll da W. A. Mozart, èsi per insatgi auter ses mo ses idiom, èsi per nus nossa sontga guerra cunter maldievers. Nus destabilin mo persunas ed instituziuns che na fan betg lur chaussa. Nus faschain nossa chaussa, en atgna missiun. I dovra nus, nus essan gugent missiunari per nossa chaussa. Nossa missiun èsi da destabilir persu-



nas ed instituziuns che na fan betg lur chaussa, donnegieschan nossa chaussa, e nus manain a la fin nossa missiun. Pir lura avain nus satisfacziun, la pasch, vegnin d'accord e perina cun nus.

Vus bab etern, eh, eternamain patern giais en ils cudeschs d'istorgia sco Quel ch'ha fatg or d'uihl en il cussegl federel e tar las bancas. Grazia grazia grazia. Jau ard da dadens anor, na sa naging s'imaginar, da bittebitte tutgar ina giada Voss vestgì cumplet cun chautschas, ma pigliar vidlonder betg pli laschar dar, e cun mai ussa senza manzegnans 30% da la populaziun svizra. La quantidad restanta da Mitte-links e mainstream-medias, 70%, è qua quantidad modesta da sa turpeggiar. Grazia fitg ch'i dat Vus.

Nus na schain betg che nus na dian mai manzegnans. I dat situaziuns, en la guerra, qua è dir manzegnans part da la strategia. Sco chefstrateg di jau: I dat in temp da dir la vardad, dat er in temp da dir manzegnans, sch'i serva a nossa chaussa. Vendetga. Nus destabilin la vardad, nua ch'ella daventa manzegna, tar auters. La fin giustifitgescha qua il ram-pin. Betg ils Hildebrands èn propi il problem, il propi problem è la traditura! Nus empruvain nus ans spruvain da la destabilir, ed avais vis co ch'ella vegn sut squitsch da buns arguments! (grins grins) Anc paucas giadas durmir sa'la er esser davent, liquidada.

Ograzia grazia ch'i dat Vus signur Blocher. I arda i brischa en mes chalzeruns cun grossas solas, es brennt in meinen Reiseschuh da viandar sin la pli nova via dal salit istoricamain gia documentada tar Vus a retschaiver grazias al lieu. Herrliberg. Vossa villa da miliardari betg bancher duess jau er chattar; savais, jau prend mes navi cun activà Voss num, na sai jau betg fallar, u che hackers avessan destabilisà il sistem. Il mal lajedia tar ils auters tant dapertut, daventa activ. Hai jau speranza gia ditg, grazia ch'i dat Vus.